

Nuncita Clodiæ expugnatione (quod circiter mediam noctem cognitum est, quum ea sub solis occasum hostis potitus esset) tantus terror curiam invasit, ut ubi primum illuxit, subito sit ad arma conclamatum. Quo signo consternata civitas cum armis in forum accurrit. Compleverat multitudo civium quicquid aræ ante curiam & auream ædem jacet. Tum jussu Patrum nunciatum populo, Clodiam cum præsidio amissam. Ad quam vocem tantus fletus coortus dicitur, tanta lamentatio, ut, capta urbe, major oriri non potuisset. Vidisses tum matronas per urbem præ nimio dolore dejectas, nunc manus ad cælum tendere, nunc pugnis pectora pulsare. Viri invicem publicam lamentari fortunam: actum esse de Republica, actum de Imperio dicere. Dolere omnes privatam fortunam, sed libertatis periculum imprimis animos versare. Credere vulgo, Genuensem victorem paulo post affuturum, qui, everso imperio, Venetum quoque nomen everteret. Quisque pro se perditis rebus, privatæ fortunæ consulere: aurum, gemmas, argentum, vestes, omnemque preciosam suppellectilem aut ad hospites in suburbana loca mittere, aut in sacris ædibus antiquisve monumentis condere: omnia luctus & pavoris erant plena. Crediderunt multi, si in ea trepidatione hostium classis fuisset ad urbem admota (quod ut Genuenses facerent, Carrarius Princeps identidem, capta Clodia, monuisset) aut urbem eo die capi, aut certe in summum discrimen adduci potuisse. Sed non omnia hominibus Superi dedere. Multi reperti sunt, qui norunt vincere, sed victoria uti nesciverunt. Præsidium quod ad Medoacum fuit, æquata solo munitione, navibus abductis, Venetias trepide revocatur. Cæterum dolere vulgo omnes, neminem esse qui fractos civitatis spiritus præsentis consilio hortationeve aliqua erigeret; quem etiam ob pristina decora populus suspiceret, cuperetque ducem in tanto discrimine habere: deploratum esse imperium dicere, deploratam omnium salutem, nisi aliquis existeret qui afflictis patriæ rebus subveniret. Unum Pisanum esse in tota urbe, qui præterquam quod omnibus

1379

*Expugna-
tionis illius
nuncius in-
gentem ci-
vitati attu-
lit terro-
rem.*